



Bentiaraq Ottosen

UKA 2023/29

Atassut

27. september 2023

**Uunga siunnersuut: Meeqqat tapersorsorneqartarnerat pillugu Inatsisartut inatsisaani inatsisip allangortinneqarnissaa pillugu inatsisissatut siunnersuut**

**(Meeqqanut aamma ilaqtariit illuini ataatsimoortumik digitalikkut sullissinnermi isumaginninnermut Aqutsisoqarfinniit ersarissaaneq il.il)**

(Meeqqanut, Inuusuttunut Ilaqtariinullu Naalakkersuisoq)

Pingaaruteqarluinnarpoq ilaqtariinnut politikkitta siammasissumik nukittuumik qileruteqartuarnissaa, aallaaviujuartariaqarporli meeqqap angajoqqaamini inuttut inerikkiartortuarnissaa tamannalu eqqarsaatigisakkatta annersaraat inuiaqatigiit akornanni ilaqtariinnermut politikki tamatsinnut pingaaruteqarluinnartuusoq. Angajoqqaat tassaapput imminut pilersornissatsinnut aamma imminut napatinnissatsinnut ilinniarfiit annersaat, tamannalu ataqqineqarluni aamma piujuarnissaa Atassut-ip pingaartilluinnagaasa ilagaat.

Inuk qitiutillugu politikkeqarneq kinaassusitsinniittariaqarpoq, pisortalli meeqqanut arsaarinnginnerminni eqqarsaatigilluinnartariaqarpoq meeqqap siunissami qanoq inissisimamajooqqataralugu ineriartortinneqarnissaa. Nunatsinni meeqqanik arsaarinnittarneq minnerpaaffilerneqartariaqarpoq, taamaasiortoqarneratigut meeqqap angajoqqaamini ineriartorluarnissaa angujumallugu.

Atugarissaarneq eqqartorneqalersinnagu puigorneqartuarpoq nunatsinni qanoq inuiaqatigiit akornanni atugarissaarnerput inissisimamajooqqataralugu. Aallaavik atugarissaarneq ilaqtariinniittarpoq, tamannalu meeqqamut ilaqtariinnullu ingerlalluurtunut aamma annertuumik angusarissaarfiusarluni. Kisiat eqqaamasassaraarput ilaqtariit inoqutigilluunniit pisortat akornanni karsimut ikillugit immikkoortinneqannginnissaat, nunatsinni tamatta innuttaasuuvugut nalilittut inissisimasut, kiffaangissuseqartullu. Qanorluunniit atugaqarsimagutta ataatsimoorluta meeqqap inuttut ineriartorluarnissaanik anguniaqatigiilluta inissisimasariaqarpugut – Arlaannaataluunniit immikkoorsitaasutut misigisimanginnissaa pingaartilluinnartariaqarparput. Meeqqat tapersorsorteqarnermikkut inissisimamajooqqataralugu pingaaruteqarluinnartumik qitiulluinnartuuvooq, tamatuminnga periarfissaavoq ilaqtariinnermi qilerut kipineqanngisaannarnissaa.

Paasiuminaatsilaarparali sooq nunatta karsianiit kommune-t tamat aningaasalersorneqarnissaat, imaaqinnartutummi isigaara qitiusumit aqutsinerujussuup kinguneranik nunatta karsiata aningaasaatai atorlugit pilersitsiniarneq takuneqarsinnaammat. Ernumassutigaa aralu aningaasaliissuteqarnermi inuit kikkut Naalakkersuisut aallerfiginiarnerai, immitsinnullu aperisariaqarpugut ”nammineerlutik kommune-t tamanna kivissinnaanginnerpaat?”

Nuna tamakkerlugu perorsaasussaaleqivugut, oqarluaannarluta ajornartorsiutigarpugut annertuumik nunap immikkoortuini perorsaasussaaleqineq. Tamakkua Naalakkersuisut eqqarsaatigisimanginnerpaat? Imaluuniit Naalakkersuisut isumaqaqinerput qitiusumiit aqutsisoqartillugu kommune-t nammalluarsinnaallugit. Tamanna eqqarsartaaseq isumaqarpunga sangutinneqartariaqartoq, qitiusumiit aqutsinerujussuaq annertuallaarnera nunatsinni ingasappallaaleqaaq.

Maani qitiusumiit aqutsinerujussuaq agguartariaqalerparput kommune-nut tunniullugu, eqqarsartariaqarpugut qitiusumiit aqutsineq annikillisarneqarnissaa annerpaangortariaqartoq.

Taamatut oqaaseqarlunga una siunnersuut itigartinneqarnissaa inassutigaa, takusinnaanginnakku siunnersuummi pitsanngoriaataasinnaasut sumiinersut. Eqqaaseqqilaarlassi nunatsinni perorsaasunik ilinniarsimasunik amigaateqaqaagut tamakkua aatsaat qulakkeereerutsigit isumaqarpunga alloriaqqittoqarsinnaasoq. Taamatulli ernumassutigigakku aningaasanik nunatta karsianut aallertussaaneq, kikkullu akiliissanersut ilisimanginnatsigu, siunnersuut itigartinneqarnissaa innersuuppara.